



Aqqalu C. Jerimiassen
Atassut

UPA 2026/176-1
13. maj 2026

Meeqqat pisinnaatitaaffii pingaarnertut tunngavigalugit nuna tamakkerlugu imigassaq pillugu politikimik Kalaallit Nunaanni ineriartortitsisoqartariaqannginnersoq kiisalu inuit ataasiakkaat kiffaanngissuseqarnerisa aammalu meeqqanik illersuinissap akornanni oqimaaqatigiissitsilluni tamanna qanoq aaqqissuunneqartariaqarnersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq, Nivi Rosing, Inuit Ataqaatigiit)

Meeraq qanoq innikkulluunniit nunatsinni inuiaqtigiinni qitiuvoq, taannalu eqqartorneqalersillugu ilimagilluinnartarpara partiit tamatta tassani qalipaatigut illikartissinnaalersarigut.

Tamaattorli iliuusissartai eqqartulersillutigit sukkanerpaaq atorlugu sammivigut allanngortarput.

Tassami meeraq piunnaarlugu politikitta qanoq pitsaanerpaatiginera pilersoortillutigit ajoraluartumik meerartagut puigorluinnarlugit nammineq malingassiuisuuniaralualuta malingassaqqinneerpaarsuujunnaarisaartarpugut.

Kikkut tamat nittartakkakut naapittarfiini nunatsinni qaffasinnerpaanut inissimasunut akuusut inuiaqatiminnut isumaqatiginngisaminnut nikassaasut, ingasammik ullutsinni meerartagut allaat TikTok-eqartillugit politikkerit ilaanni nipi atortagaq apeqquusernarsinnaasaqaaq.

Imigassarli eqqartorneqalersilugu, uagut tamatta partiuusugut soorunami qularnanngilaq kissaatiginngikkipput inuiaqatigiit imigassamik atuinerunissaat, imaluunniit pissutsit ajornerunissaat.

Uanili pingaarnerpaaq Atassummiit imigassaq eqqartorneqalersillugu qaqilertagarput tassaasarpoq, imigassaq, imerajuttuuneq imertarnerlu paquminartutut isikkoqarniartuartillugu ajoraluartumik meerartatsinnut ussarnartutut iluseqartuassaaq.

Imigassartortariaaseqarneq inuiaqatigiit akornganni nunatsinni oqallisissaavoq annerpaaq, soq danskinit imigassartunnginnerungalualuta taamarsuaq erseqqissumik imerajuppalaarnerusutut isikkoqartinniarnepartarpugummita?

Qivialaariartigu taanna, uagut nammineq atagu qanoq imertarnerput takorluulaariartigu; tallimangorneq aallartippoq, tassa weekend tamaat oqariartaaseq malillugu panertoornaversaaginnaq imerneq aallartissooq.



Taassumap suna ersersittarpaa taava inuiaqatigiinni? Imigassaq ajortuusoroq. Uffa imigassaq ajortumik atorneqartoq, imerajuttuunerunngilaq unnukkorsiornermi anaana ataatalu immiartorfik ataaseq viinnisorpata. Isiginninnerli tassani allanngoreertaraaq, imerajuttuni immaqa perortuusut ilaasa imigassamut akeqqersimalernej aallaavigalugu meeqqatik oqaluuttarpaat uku angajoqqaavi imertartorsuummata ilagissanngikkaat, uffa allarluinnarmik taakkua imigassaq pillugu isiginnittariuseqarlutillu atueriuseqartut. Tassani paasinninnerit marluk assigiinngitsut nuereerput, atuisutut eqqarsartariuseq, taavalu atuisuunngitsutut eqqarsartariuseq.

Nunarsuup sinnerani nunani killerni amerlanerpaani immiassanik angerlarsimaffimmi suliarineqarsinnaasunik nammineq atugassatut inerteqqutaanngilaq, uagut nunatsinni tamanna kanngungajattarporluunniit eqqaassallugu. Angerlarsimaffimmi immiaaqqamik nammineq suliaqarsinnaalernissamik eqqartuineq immiapalaamik eqqartuinnermut saqitineqareertarmat arlalissuarnik.

Nunalluunniit killilersuinerpaaffiusut soorlu nunani avannarlerni, allaat angerlarsimaffimmi nammineq pissamik sanasinnaaneq inerteqqutigineqanngilaq, uagut immaqa kisiartapajaanngorpugut nunat muslimeqarfiusut peqatigalugit.

Aap, Atassut suleqataarusuppoq meeratatta illersorneqarnissaannut, imigassamullu politikkeqarnissami inuiaqatigiittut tassani kattorsaanikkut allatigullu eqqartuisinnaanermut periarfissat sammineroreertariaqarpagut.

Uanilu imigassat assigiinngitsut eqqunneqarnerinut akitsuutitigit isertitaasut toqqaannarnerusumik peqqinnissaqarfimmut katsorsaanermullu saatinneqarnissat pingaartuuvoq.

Imigassap ammasarfii allallu, ilaana naapeqatigiinniarfigikuttoorsinnaaqaagut, uanili siorna saqqummiunneqartumi arlalissuarnik ikkarnartitaqarluta isummagut erseqqissumik saqqummiuttareerlugit.

Angerlarsimaffinni eqqissiviilliortarnerit arlalitsigut malitseqartarputtaaq nangikkiaanerpasuit pisartut kingunerinik, imerniartarfiit ammarsarfiisa sivitsorneqarneranilli nangikkiaanerritaaq qanoq kinguneqarneri paaserusunnarpoq, aammalu nunat ilaanni periuserineqartoq qanoq sunnuteqarsinnaanersoq paaserusunnarluni, tassalu imerniartarfiit matugaagata allat ammartartut "nangikkiaaffittut" immaqa taaneqarsinnaallutik ammartartut qanoq kinguneqarsinnaanersut, angerlarsimaffinni eqqissiviilliortarnerit millisarumallugit.

Imigassarmi tupalu eqqartortillutigit, atuingaatsiartuusut akia soqutigisanngilaat, uanilu innersuussutaasimasuni akiata qaffasitseruluttuarnissaanik siunertaqarnermik oqariartuuteqarneq, pissakereersunut aatsaat iluamik pissaqannginnerunermik kinguneqaannassaaq, sulimi pisiarissammassuk qanorluunniit.



Oqallisissiaq soqutiginaq, oqallisissiaqartumullu qujalluta taamak Atassummiit oqaaseqarpugut.